

## Sing vooraf staande: Psalm 146:8 (p. 701)

- 8 Dis die God der leërmagte, / troue Bondsgod van weleer,  
God van wordende geslagte, / tot in ewigheid die HEER.  
Sion, sing die God ter eer, / prys sy grootheid, loof die HEER!

Ons hulp is in die Naam van die Here wat die hemel en die aarde geskape het.  
Geliefdes, genade en vrede vir u van God ons Vader en die Here Jesus Christus deur die  
kragtige werking van God die Heilige Gees.

**Amen.**

## Lofpsalm 19:1 (p. 82)

- 1 Die hoë hemelrond / vertel met blye mond / Gods heerlikheid en eer,  
en, wonderbaar deurglans, / vermeld die wye trans / die werke van die HEER.  
Die dag roep orals luid / en duisendstemmig uit / dié loffelike sprake;  
die nag se stille stap / meld kunde<sup>en</sup> wetenskap / deur al sy donker wake.

## Gebed

### Psalm 43:1, 4 (p. 220)

- 1 HEER, doen my reg, hoor my gebede, / en twis my twissaak tog vir my!  
Want waar ek heengaan, skrede<sup>op</sup> skrede, / beleër my 'n bese<sup>en</sup> wrede,  
'n huigelende teenparty / wat my my saak bestry.
- 4 Dan gaan ek in na Gods altare, / tot God, my God, my vreugde<sup>en</sup> lied;  
dan speel ek met die harpenare, / dan ruis vir U my blye snare –  
vir U wat my, ná kort verdriet, / 'n ewige vreugde bied.

Skriflesing: 2 Petrus 1:1 – 15.

Teks: 2 Petrus 1:10. Kategismus Sondag 32

**Daarom, broeders, moet julle jul des te meer beywer om julle roeping en  
verkieping vas te maak; want as julle dit doen, sal julle nooit struikel nie.**  
(2 Petrus 1:10 AFR53)

Daar is drie begrippe wat onlosmaaklik saamgaan. Hulle is:

- Ellende
- Verlossing
- Dankbaarheid

Om godsalig te lewe kan alleen gebore word uit diepe dankbaarheid vir ons verlossing in  
Jesus Christus, en dankbaarheid is weer slegs moontlik as ons bese<sup>f</sup> hoe ryk God se genade  
is, want ons is diep in die ellendes.

Dit is hoe dit gebeur dat 'n mens wat sy ellendes diep beleef, goeie werke doen.

- Hy probeer nie om die hemel daarmee te verdien nie. Christus het dit klaar vir hom  
verdien.
- Hy probeer net dankbaar wees. Daarom doen Hy goeie werke. Hy probeer om God se  
gebooi<sup>e</sup> só nougeset te gehoorsaam en uit te leef om daarmee te wys hoe diep sy  
blydskap lê.
- Ons goeie werke word gedoen ter wille van die bloed van Jesus Christus wat vergiet  
is.

Dink net waarvan het Christus ons verlos. Dit is nou baie maklik om te sê: Hy het ons van al ons sondes verlos. Maar kom ons dink weer.

- Dit is nie net sommer van sondes verlos nie. Ons is absoluut verwerplik voor God.
- Ons kruip in die sondes, en as enigeen van ons kry wat ons verdien, behoort ons net in die hel te beland.
- Daar is nie een van ons wat hoegenaamd werd is om in die hemel toegelaat te word nie.

Waarom sal God ons in die hemel toelaat?

- Net Hy weet dit, want Hy het besluit om ons lief te hê.
- Daarom laat Hy sy Seun vir ons sondes sterf sodat ons as ons die dag voor God se regterstoel staan, vrygespreek kan word.

Waarom het Christus dan vir ons kom sterf? Daar is drie redes.

- Die eerste is God se liefde vir ons.
  - Ons kan dit nie verklaar nie. God het net in sy alwysheid besluit dat Hy ons liefhet, en daarom sterf Jesus vir ons.
- Die tweede rede is omdat God ons wil behou.
  - Die HERE wil ons vir ewig bewaar.
  - Hy wil nie hê dat die Satan ons uiteindelik sal besit nie, al verdien ons dit ook.
- Die derde rede vir ons verlossing is omdat God wil hê dat ons Hom moet prys.

Ons word verlos tot gehoorsaamheid. Dus: Om uit dankbaarheid te lewe tot eer van God.

Dink ook net hoe het die Here Jesus ons verlos.

- Hy het arm geword om ons ryk te maak.
- Die Vors wat mag het oor die lewe en die dood kom sterf om ons te red.
- God wat in die hemel woon, daal neer om hierdie vernedering deur te gaan.

Dit is ondenkbaar, want nie een van ons sou so iets doen nie.

Ons hou nie eers daarvan dat iemand ons slegsê nie, maar die Here Jesus het self 'n vloek geword, sodat Hy ons kon heilig!

- Ons behoort elke oomblik te jubel van blydschap, soos wat die slawe in die ou tyd gejubel het as hulle vrygelaat is.
- Want ons was slawe van die satan en is vrygekoop deur die Here Jesus Christus!

Dit kan tog nie anders nie, daar moet iets roer in ons.

- lewers moet daar 'n groot dankbaarheid bly vassteek sodat dit nooit weer kan wegraak nie.
- Dan moet ons mos 'n dankbaarheidslewe lei.

Ons gaan 'n bietjie dieper in op hierdie saak.

- Die Here Jesus Christus het nie net iets VIR ons gedoen nie.
- Hy het ook iets IN ons gedoen. Hy het ons 'n nuwe hart en 'n nuwe lewe gegee – 'n nuwe lewe in Christus!

Die Heilige Gees van God woon in ons, en werk in ons.

- Hy verander ons gesindheid.
- Hy bou ons geloof.
- Hy praat ons aan as ons oortree.
- Dit beteken nou maar net dat die Heilige Gees ons leer om dankbaar te lewe, en om berou te hê as ons sondig.

*Dit is 'n nuwe lewe en 'n nuwe dankbaarheid. Vanselfsprekend wil ons Hemelse Vader alleen in 'n rein hart bly en onbesproke gelowiges as eiendom hê.*

Die Gees van God **vernuut** ons tot die ewebeeld van God. Hy skenk aan ons die insig en geregtigheid om die werk van Christus te kan beleef, én prakties toe te pas.

- Dit beteken dat ons geestelik 'n heeltemal nuwe gestalte kry.
- Ons lyk nou nie meer soos kinders wat aan die satan behoort en op pad is na die hel toe nie.
- Ons lyk nou soos hemelinge – mense wat met vreugde en met blydschap lewe. Ons lyk soos mense wat God ken en daarom in hulle daaglikse lewe dinge doen wat by God pas.

Dankbaarheid is soos dit op 'n ander plek gestel word:

- Nuwe mense in Christus, geskape tot goeie werke.
- Goeie bome wat goeie vrugte voortbring uit dankbaarheid aan hulle Skepper wat van hulle goeie bome gemaak het.

Teen hierdie agtergrond moet ons nou weer na onself kyk.

- Ons weet mos verseker dat as dit van ons afhang, óns liever nie voor die regterstoel van die Here sou wou staan nie.
- Want ons weet dat die vonnis baie sleg sal wees.

Maar nou beteken dit nie dat ons ons hele lewe lank moet twyfel en wonder wat gaan van ons word nie. Ons het die vaste sekerheid van ons verlossing.

- 'n Bekeerde mens weet hy kan in God se ewige koninkryk ingaan op sterkte van die Here Jesus Christus se versoening.
- Dit is nie 'n raaispul nie. Dit is 'n vaste kennis:
  - Die Here Jesus Christus het klaar vir my die hemelpoorte oopgemaak.
  - Hy het my binnekant die hemel toegesluit.
  - Niemand en niks kan my uit die verlossing wat bewerk is uithaal nie!

Dit is wat geloofsekerheid is.

Maar dan moet jou lewe hierdie geloofsekerheid bewys!

- Enige mens wat sê hy is uitverkies en met God versoen in Jesus Christus maar lewe soos 'n navolger van die satan, het baie rede tot kommer.
- Hy moet hom bekeer, want sy lewe bewys dat hy nie 'n verlose is nie.

*'n Verlose mens is so dankbaar dat dit oorkook.*

- *Hy kan nie genoeg doen om God te loof en te dank vir die feit dat hy uit die mag van die satan en die hel bevry is nie.*
- *Daarom doen hy goeie werke – sy hele lewe is 'n jubellied van dankbaarheid.*

Nou het die goeie werke mos 'n totaal ander betekenis. Die waarde wat die Roomse Kerk daaraan heg, naamlik dat dit is om jou saligheid te verdien, verval nou heeltemal.

- Dankbaarheid staan juis lynreg teenoor verdienste!
- Ons is dan nou dankbaar omdat ons van Christus verlossing en die ewige lewe ontvang.
- Ons is dankbaar omdat ons uit die hel uitgeruk is. Daarom goeie werke!

Al is goeie werke nie 'n middel waardeur ons nou ons saligheid verdien of kan verdien nie, neem dit nie enige verantwoordelikheid van ons af weg nie.

- Dankbaarheid is ook 'n verantwoordelikheid!
- Dankbaarheid is nie 'n soort etiket wat jy net kan gebruik as dit jou pas of wanneer jy wil nie.

Dankbaarheid is 'n plig waarmee jy iets moet bewys!

- *In ons alledaagse lewe bewys dit dat ons 'n goeie opvoeding het.*
- *In ons godsdiens bewys dit dat ons verlostes is, en dat ons ware kinders van God is.*

Nou moet u waak vir die volgende redenasie: Ons kan nie roem op ons swakheid in dié sin dat ons ons daarop beroep vir ons sondes nie.

- Met ander woorde ons kan nie sê dat ons buitendien nie opgewasse is teen die satan en sy aanslae nie, en daarom sondig ons nou maar nie!
- Ons kan ons nie met so 'n redenasie beroep op ons verlossing in Jesus Christus nie!
- Die verlossing in die Here Jesus Christus plaas juis 'n groter verantwoordelikheid op ons om goeie werke te doen.

Baie eenvoudig gestel kan ons dan sê dat 'n persoon wat in sonde voortploeter, nie 'n uitverkorene is nie.

- Hy dien die duiwel met sy laksheid om teen die kwaad te stry.
- Hy onteer terselfdertyd die Here Jesus Christus.

Verder ook nog dit: Ons kan nie sê ons stry teen die sonde maar verloor elke keer die stryd nie.

- Ons moet hard genoeg stry om te oorwin.
- Ons doen baie keer nie goeie werke nie omdat ons ons net genoeg teen die kwaad versit om ons gewete stil te maak.
- Wanneer ons 'n ent weg is met 'n goeie daad, dan voel ons tevrede dat ons ons deel gedoen het, en gee ons dan eintlik met blydskap oor aan die kwaad! Hierteen moet ons waak!

Gee liever soos die Here Jesus Christus alle wêreldse plesier prys, en bepaal jou by die lewenswyse wat deur God as volmaak en goed beskou word.

- Dan bewys jy daarmee dat jy 'n ewige lewe by God het – iets waarop die mense wat die goeie dade nie doen nie, jaloers behoort te wees.
- Preek met jou goeie werke jou verlossing en jou dankbaarheid aan God op só 'n manier dat jy rigting aan die lewe gee!

Doen dit op so 'n manier dat jy as't ware op elke terrein waar jy beweeg, geloofsleiding neem.

- Gee moed aan die wat verswak raak.
- Doen goeie werke met blydskap en groot vreugde!
- Wakker daarmee die hoop by almal aan!

Laat jou goeie werke 'n roepstem wees wat almal rondom jou lok en roep na die Here Jesus Christus toe.

- Dan stig jou lewe almal; bemoedig al die gelowiges, en beskaam terselfdertyd die ongelowiges.
- Dan is jy 'n trots vir Christus en 'n trots vir God se kerk.

Kom ons lees Kategismus Sondag 32 saam.

**Vraag 86: Waarom moet ons nog goeie werke doen, terwyl ons tog sonder enige verdienste van ons kant alleen uit genade deur Christus uit ons ellende verlos is?**

**Antwoord:** Omdat Christus ons, nadat Hy ons met sy bloed gekoop het, ook deur sy Heilige Gees tot sy ewebeeld vernuwe sodat ons met ons hele lewe bewys (a) dat ons God dankbaar is vir sy weldade en Hy deur ons geprys (b) word: Verder, sodat ons vir onself uit die vrugte van ons geloof sekerheid kan kry. (c), en ons deur ons godvresende lewe ons naaste ook vir Christus kan wen (d).

(a) Rom 6:13; 12:1, 2; 1 Pet 2:5, 9; 1 Kor 6:20. (b) Matt 5:16; 1 Pet 2:12. (c) 2 Pet 1:10; Matt 7:17 Gal 5:6, 22. (d) 1 Pet 3:1, 2; Rom 14:19.

**Vraag 87: Kan die mense dan nie salig word wat in hulle goddelose, ondankbare lewe volhard en hulle nie tot God bekeer nie?**

**Antwoord:** Nee, glad nie. Want die Skrif sê dat geen onkuise, afgodedienaar, egbreker, dief, gierigaard, dronkaard, lasteraar, rower en sulkes die koninkryk van God sal beërwe nie (a).

(a) 1 Kor 6:9, 10; Ef 5:5, 6; 1 Joh 3:14.

**Amen.**

### **Slotgebed**

Ons sal met hart en mond, o HEER, U roem verkondig en U eer. Ons smeek U, HERE, om in guns na ons gebed te luister en ons uit te red. Ons bid dat u op ons klag, ons hart en gees genees en ons smarte versag. Ons smeek uit genade alleen.

**Amen.**

Slotpsalm 31:1, 5 (p. 143)

- 1 Net soos 'n rots, gesterk, gestewig / teen storm en ongety, / is U, o HEER, vir my.  
Maak my tog nie beskaamd vir ewig. / Bevry my, hoor my bede / na u geregtighede.
- 5 In U, my God, wil ek weer bly wees; / die guns wat U my bied, / wil 'k lofsing in my lied.  
U was dit wat my wou naby wees, / wat my in guns aanskou het / toe ek op U gebou het

Die genade van die Here Jesus Christus en die liefde van God en die gemeenskap van die Heilige Gees bly by u almal.

**Amen.**

Dr MJ du Plessis  
Hulpdienspredikant  
Gereformeerde Kerk Clanwilliam  
Datum: 17 November 2013